

30 JUN 2001

Umno-Konvensyen

UMNO DICADANGKAN GUNA KONSEP "PARTI KUASAI KERAJAAN"

SHAH ALAM, 30 Jun (Bernama) -- Pengamalan konsep "parti menguasai kerajaan" dan bukannya "kerajaan menguasai parti" dilihat dapat membantu membanteras sindrom kakitangan kerajaan tidak menyokong parti dan kerajaan.

Cadangan konsep itu, jika diamalkan, dapat membela nasib golongan akar umbi yang juga kakitangan kerajaan yang setia kepada Umno selain memastikan ketua-ketua jabatan kerajaan menyokong Umno.

Ia adalah antara resolusi perbincangan dan sumbang saran anggota-anggota Umno Selangor pada bengkel politik sempena pra Konvensyen Umno Selangor ke-10 yang diadakan sepanjang Mei dan bulan ini.

Menurut resolusi itu menerusi pendekatan "parti menguasai kerajaan", satu gerak kerja dianggotai pegawai dan kakitangan menyokong Umno boleh ditubuhkan bagi membantu Umno menyebarkan maklumat yang betul kepada rakyat.

Pengamalan konsep itu juga boleh membanteras sindrom pengiktirafan lebih kepada mereka berjawatan tinggi dalam kerajaan.

Cadangan dalam resolusi itu dibincangkan dan dirumuskan pada Konvensyen Umno Selangor ke-10 yang berlangsung hari ini dan esok.

Konvensyen itu dirasmikan oleh Presiden Umno dan Datuk Seri Dr Mahathir Mohamad di Hotel Grand Blue Wave di sini.

Kira-kira 1000 pemimpin Umno cawangan, bahagian dan negeri di seluruh Selangor mengambil bahagian dalam pra konvensyen dan konvensyen Umno negeri itu sepanjang dua bulan sejak 5 Mei lepas.

Selain bengkel politik, konvensyen itu mengadakan bengkel ekonomi, sosial, agama dan pendidikan dan latihan.

-- BERNAMA

RIZ NAK